

# Prognostitgar nair e scriver cifras cotschnas

Barbara Janom Steiner ha defendì la metoda da definir il preventiv chantunal

■ (anr/ac) **La dumonda da la credibilitad da las prognosas finanziaias dal chantun èn stadas en il center da la debatta d'entrada tar il plan da finanzas per ils onns 2017–20. La proposta da la fracziun socialdemocratica da refusar la fatschenta è vegnida renviada clermain dal cussegl grond.**

La cussegliera governativa, *Barbara Janom Steiner*, ha explitgà ier ils puncts impurtants da la planisaziun da las finanzas dal chantun Grischun per ils proxims onns. Dad ina vart ha ella definì, sin giavisch da la cummissiun da gestiun dal chantun, ils terms «deficit structural» ed «a vista mesauna». Quai per sclerir pli exact tge ch'il chantun veglia intervegnir per impedir in deficit structural a vista mesauna. Janom Steiner ha definì in deficit structural per cifras cotschnas betg motivadas da la conjuntura e per vista mesauna ha la ministra da finanzas dal chantun Grischun definì in spazi da quatter onns. Per la fracziun socialdemocratica e sco pledader da la minoritad da la cummissiun predeliberanta ha il deputà, *Conradin Caviezel* (ps, Cuira), renfatschà al chantun da prognostitgar sapientivamain e sistematicamain la situaziun finanziaia dal chantun. E quai tenor il princip da prognostitgar nair e scriver cifras cotschnas. In tal agir, uschia Caviezel, impedeschia ina lavur seriusa dal chantun e dal parlament areguard las finanzas. La cussegliera governativa ha renvià las renfatschas e rendì attent ch'almain la mesadad dal preventiv dal chantun Grischun saja dependent da contribuziuns da la confederaziun. Las decisiuns dal parlament federal hajan



La cussegliera governativa Barbara Janom Steiner ha renvià da budgetar sapientivamain cifras cotschnas.

FOTO O. ITEM

consequenzas directas sin il preventiv chantunal. Vinavant ha Janom Steiner refusà la pretensiun da producir in preventiv negativ a moda sistematica. Ella ha visà a la summa totala dal preventiv chantunal da 2,5 milliardas francs. Sulet ina differenza da dus pertschient haja in effect da plirs milliuns sin il preventiv e sin il quint. «Ins pudess era resguardar che noss preventiv è stà per 98 pertschient correct ils davos onns.»

## Enfin uss è la situaziun finanziaia buna

Da la vart burgheisa ha i da laud per la ministra da finanzas per exempel dal deputà e manader da la fracziun cristiandemocratica, *Marcus Caduff* (pcd, Lumnezia). El ha plegendà la situaziun finanziaia dal chantun che lubeschia in agir anticiclic che pussibiliteschia da sustegnair la conjuntura per cas da basegns senza stuaier far daivets. Nagut vulan las partidas burgheisas dal cussegl grond savair dad augmentar las taglias. La regenza ha definì quella pussaivladad dad augmentar las impostas chantunales sco part da la strategia da stabilir las finanzas chantunales sche quai fetschia da basegn. La regenza ha definì sia strategia en trais prioritads e tant la ministra da finanzas sco singuls deputads han appellà al cussegl grond da sez sa tegnair a la strategia definida e da na concedir novs projects che provotgeschian expensas supplementaras. Per il deputà, *Jon Pult* (ps, Cuira), instradescha la part burgheisa dal cussegl grond puncto finanzas in alarmisssem nunnecessari. Enfin ussa sa preschentia la situaziun finanziaia dal chantun en in fig bun stan.